



Durantez epailea Parisera joan da «El Francesen» armak ikertzera

Santiago Brouarden hilketan erabilitakoekin alderatu nahi ditu

Santiago Brouarden hilketaren sumarioa instruitzen duen Maria Isabel Durantez epailea Parisera abiatu da atentatuan erabilitako armei buruzko ikerketa bat egiteko asmoz.

BILBO

Santiago Brouarden hilketan erabili ziren armak «El Francesek» Pariseko armadenda batean erositako berberak diren ala ez egiaztatu nahi du Durantez epaileak Parisera joan den batzorde judizial honen bidez, Vasco Press albiste agentziak atzo ezagutzera eman zuenez.

Durantez Gil epaileak, Interpolen bidez igorritako ebazpen batez, «galdezkatzeko batzorde» baterako baimena eskatu zuen, Parisera joan ahal izateko eta bertako «Armes 2.000» armadendaren jabea galderak egin ahal izateko.

Epaileak ezagutu nahi ditu Juan Jose Rodriguez «El Francesek» erositako armak zeintzuk ziren. Lortutako datuak Brouarden hilketan erabilitakoekin alderatu dira. Hauek Bilboko Polizi Goi Zuzendaritzan daude.

Pariseko armadendan Juan Jose Rodriguezek erositako armei buruzko datu zehatzak eskatzeko, Bilboko epaileak erosketa fakturaren fotokopia darama.

Diligentzia hau, «benetan garantzitsua eta epaitegiarekin zerikusirik ez duten arrazoiengatik egin ez dena —aipatu zuten Vasco Pressen iturriek—, duela denbora asko egin behar zen, deligentzia honetatik atera daitezkeen ondoriek interes handia bait dute».



Juan Jose Rodriguez «El Frances» prozesaturik dago 'Brouard' kasuan. EFE

Epaileak jakin nahi du «Lathy» pistola bat eta «Army Jaeger» karabina baten erosketa faktura benetako den ala ez. Fakturan, «Lathy» pistola Saint Etienneko frogaz zentruan baliogabetua zegoela zehazten da, hau da, disparatzeko ez zuela baliotza. Brouarden hilketaren ondoren kontsultan aurkitutako pistola «Lathy» markakoa da. Aipatutako fakturan «Army Jaeger AP-75» karabina bat agertzen zen. Atentatuaren ostean Poliziak inkautatutako «Army Jaeger AP-74» bat zen eta 22ko kalibreakoa.

Parisera joandako batzorde judizialak (epailea eta epaitegiko funtzionari bat) jakin nahi du salmenta

haren berri eman ote zitzaion Poliziari eta «El Francesek» erosi zituztean, 1983ko urtarrilean, Frantziako legediak arma horien salmenta libre baimentzen ote zuen. Eta «Lathy» pistola baliogabetu ondoren, berriro konpondu eta disparatzeko moduan jarri ote zitekeen.

PARISERA HELDU EZ ZEN AGINDUA

1988ko martxoan, orduan Bilboko lehen instrukzio epaitegiko titularrak zen Julio Garcia Braga epaileak ebazpen bat agindu zuen: Michel Legrand epaile frantziarrak iker zitzala orain Durantez epaileak argitu nahi dituenaren antzeko kontuak.

«Albia» kafetegiko langileek gaurko zuten deklarazioa atzeratu egin da

BILBO

Gaur eta bihar «Albia» kafetegiko bederatzi langilek deklaratu behar zuten «Brouard» aferaren inguruan, Maria Isabel Durantez gai hau daraman epaileak agindutakoaren arabera. Baina Pariseko bidaiak atzeratu ditu gaurko deklarazioak. Biharko egindako deialdiak, berriz, ez dituzte atzeratu, Vasco Press agentziak jakin ahal zenez.

Langile guzti hauek 1983 eta 1984 artean ihardun zuten lanean aipatu kafetegian, hain zuzen ere, Luis Morcillo enpresari granadatarrak zuzendu zuen bitartean. Morcillo HBko buruzagiaren hilketan izan dezakeen eraginagatik prozesatua dago, eta aurkitu eta atxilotzeko agindua eman dutenez, gaur egun ezku-

tuan dago.

Lekuko hauek deklaratzeko eskakizuna Txema Montero Brouard familiaren abokatuak egin zuen. Gaur deklaratu behar zuten lekukoak Jose Ramon Gomez Gracia, Natividad Cordon, Antonio Reinoso, Antonia Serrano, Jose Fernandez Vazquez eta Angel Piñeiro dira. Bihar, oster, Agustina Zamarreño, Carlos Arri, Juan Lopez eta Jose Manuel «Albia» kafetegiko langileak deitu dituzte.

Era berean, Durantez epaileak Jose Ramon Gomez Gracia Bilboko enpresaria bigarren aldiz deitu du deklaratzera, Bilboko medikuaren hilketara gaur Goardia Zibileko eta Defentsa Ministeritzako zerbitzu sekretuekin zuen harremana dela eta.

Gomez Graciari agenda ohostu

zioten autotik, eta beronen fotokopiak instrukzio epailearen esku utzi zituzten. Agendan Brouarden hilketari buruzko datuak eta polizia batzuen izenak eta telefonoak agertzen dira, Michel Dominguez eta Jose Amedorenak barne.

Gainera, Durantez epaileak Carlos Gonzalez eta Jose Maria Gonzalez Bilboko gau-klub bateko jabeak deitu ditu deklaratzera, «Albia» kafetegiko ugazabekin zuten harremana dela eta.

Alabaina, epaileak atzera bota ditu Txema Monterok egindako beste eskakizun batzuk, hain zuzen Alfonso Juan Gambien deklaratzera deitzea eta Mohamend Talbi GALKidea Jose Amedo polizia eta Rafael Masa Goardia Zibileko teniente koronelaren arteko bekadurak.

Espainiako erregea Gernikako Juntetxean hilaren 30ean

DONOSTIA

Espainiako errege-erreginak Gernikako Juntetxea ere bisitatu dute hilaren 30 eta 31n Euskal Herrira egingo duten bisitaldian, gobernu zentralako iturrietatik atzo baieztatu zenez. Lehen egunean, uztailaren 30ean iritsiko dira helikopteroz Bizkaira, hurrengo egunean Loiolako San Inazioaren V mendeurrenako ospakizunetan parte hartzeko.

Juntetxearen inguruetan dauden Eduardo Txillida eta Henry Moore-ren eskulturak ikusi ondoren, Juntetxean izango dira Juan Carlos I eta Sofia errege-erregin espainiarrak eta ziurrenik harrera ofizialen bat egingo zaie bertan.

Espainiako erregeak Euskal Herrira egiten duen hirugarren bisitaldi ofiziala da hau, eta lehenengoan 1981eko otsailean ere Gernikako Juntetxean izan zen ekitaldi instituzional batean.

Gernikako bisitaldiaren ostean, Gipuzkoara joango dira monarka espainiarrak, eta bertan bi egunetan egongo direla aurrikusi da. Hilaren 30ean Donostiako Loiolako Koartel Militarera

joango dira eta egun berean Euskal Autonomi Elkarteke agintarien harrera ofiziala jasoko dute Gipuzkoako hiriburuko Miramar Jauregian.

Espainiako Gobernuak iturriek ez zuten hala ere zehaztu Joxemiel Barandiaran historiagile eta etnologoa bisitatuko ote duten Ataungo bere etxean, zenbait informaziok hori aurreratu badu ere.

Biharamonean, hilaren 31n, San Inazio jaio zeneko V mendeurrenako ospakizunetan parte hartzera joango dira Loiolako Santutegira. Prozesioan joango dira euskal agintariekin batera eta ondorengo ekitaldi erlijiosoetan izango dira. Angel Sukia, Konferentzia Episkopaleko lehendakariak eta Aita Santuaren ordezkariak zuzenduko ditu elizkizunak, bertan izango da baita ere, Hans Peter Kolvenbach, jesuiten Aita Nagusia. Ez Espainiako Gobernuak iturriek ez eta Ajuria Eneakoek ere ez dute bisitaldi honi buruzko zehaztasun handirik eman. Gernikako Juntetxean izango dela baieztatu ondoren, ziurtzat jotzen da Donostian egingo dituela bi gau behintzat.

ETAren atentatuez mintzatu dira Corcuera eta Italiako ministroa

MADRIL

Vicenzo Scotti Italiako Barne ministroak atzo arratsaldean bildu zen Jose Luis Corcuera Espainiako Barne ministroarekin, ETAk berriki Italian interes espainiarren aurka egin dituen atentatu berri emateko.

Scotti arratsaldeko lauretan heldu zen Madrilera, eta seietan bildu zen Corcueraekin Barne Ministeritzako egoitzan. Aipatu gaiaz gain, Espainiako eta Italiako Gobernuen terrorismo eta itsasoan ematen den droga trafikaren arloetan sinatutako hitzarmenak aztertu zituzten. Lehenak 1987an egin zen, eta bigarrena, oster, 1990ean.

Beste gai bat Ipar Afrikatik eta Eki Europa Mediterraneoan bi estatutara iritsi daitezkeen etorkinak izan ziren, Efe Barne Ministeritzako itu-

riak aipatuta jakin erazi duenez.

Gaur Italiako Barne Ministroa Sevillan abiatuko da, «Expo-91eko» eremua bisitatzeko eta erakusketa horretako segurtasun arduradunekin hitz egiteko.

Sevillatik, berriz, Vincenzo Scotti Barcelonara abiatuko da, datorren urtean Joko Olinpikoak izango diren erantzun olinpikoaren eraikuntzak ikusteko.

Barne Ministeritzako iturrien arabera, Scotti Espainiara egin duen bisitaldi honen arrazoiak Sevillan eta Barcelonan 1992an izango diren gertakizunen segurtasun neurrien berri jasotzea izan da.

Ildo honetatik, aipatu iturriek azpimarratu egin zuten Italiak arlo honetan daukan esperientzia, 1990eko Munduko Futbol Txapelketan agerian geratu zen bezala.

Bi pertsona atxilotu zituen atzo Polizia Nazionalek Barakaldon

BILBO

Polizia Nazionaleko partaideek bi pertsona atxilotu zituzten herenegun goizaldeko ordu bata inguruan Barakaldon, Gobernu Zibileko indarrek baietsi zuten.

Atxilotuak Silvia Maria Unzalu 29 urteko bilbotarra eta Joseba A. Madariaga 32 urteko bilbotarra dira, eta ETako «Matalaz» komandoarekin harremanik ba ote duten aztertzen ari da Polizia.

Komando horretako partaideak izatea leporatzen dieten hiru kide

atxilotu zituen Poliziak Barakaldon joan zen ekainaren seian, tiroketa baten ondoren, Gobernu Zibilaren arabera.

Une horretan, Jon Mirena San Pedro, Raul Angel Fuentes eta German Urizar atxilotu zituen Poliziak, talde armatuko partaide bezala. Duela gutxi Jon eta Germanek jipoi bana hartu dute gartzelako zeldan funtzionarien eskutik.

Geroagoko ikerketen ondoren, Raul Alonso Alvarez, Asier Kintana eta Laurentz de la Llama Vega atxilotu zituzten.